



Protocol

dalla radunonza generala ordinaria dalla Pleiv Tujetsch, mardis, ils 14 d'avrel 2026 allas 19:00, en sala Cristalla en Halla da sport e cultura Dulezi a Sedrun.

Tractandas

1. **Avertura e beinvegni**

Igl actuar Tarcisi Hendry beneventa cordialmein ils presents, parochianas e parochians dalla Pleiv Tujetsch, era en num dil cassier Primus Deragisch. A tuts giavischa el in bien ed emperneivel decuors dalla radunonza da pleiv pigl onn da quen 2025.

Igl ei daventau tradiziun che la radunonza vegn aviarta cun in flimet da tempra religiosa. Uonn muossa igl archivar dalla pleiv in film ord la vischnaunca da Sumvitg che muossa la processiuon da s. Mudset digl onn 1939. In bischu d'in film ch'ins sa bein cumparegliar cun nossa situaziun da lu ella val.

Ell'introducziun dat el in'egliada anavos ed enquera fastitgs historics el decuors digl onn 2025. - In fatg meins legrevivel ei staus quel d'ina suprastonza d'in onn senza tgamun, senza president/a. - Per l'emprema gada ha la pleiv giu in sulet emploiau, numnadamein Tarcisi Monn, Rueras, che ha ademplier la funcziun da caluster e survigilader da tuts beins dalla pleiv. - In decisiv pass d'avinischaziun han las treis pleivs da Sursassiala, Medel/Lucmagn, Mustér, Tujetsch, fatg cun la formaziun d'ina regiun pastorala, numnadamein la Regiun pastorala Sursassiala a partir digl 1. d'uost 2025. - Las treis pleivs han eligiu dunna Rilana Cadruvi, Trun, sco collaboratura pastorala per tutas treis pleivs e cun plascher sa igl actuar beneventar ella oz en nies miez.

La gliesta da tractandas ei stada publicada el Fegl official La Tuatschina sco era el rapport annual tarmess tier avon varga diesch dis en mintga casada dalla val. Ils responsabels proponan dad amplificar quella sut tractanda 9. Elecziuns, cun amplificar cun letra c) elecziun d'in delegau-suppleant pil parlament dalla Basergia catolica Grischuna. Neginas remarclas ni amplificaziuns vegnan ord miez dils presents, aschia che la gliesta da tractandas vegn approbada. La radunonza vegn officialmein aviarta entras igl actuar.

Perstgisai ein Roswitha Monn, Sedrun, Gion Giachen Monn, Rueras e Rezia Giger, Selva

2. **Elecziun dad in dumbravuschs**

Sco dumbravuschs vegn Marcel Schmid, Gonda/Sedrun, eligius. El constatescha ina perschientscha da 32 personas.

3. **Approbaziun dil protocol dalla radunonza generala dils 11 d'avrel 2025**

Il protocol redigius digl actuar Tarcisi Hendry, vegn approbaus unanimamein cun admetter in engraziament per la redacziun.

4. **Rapport annual dalla pleiv**

Il rapport annual dils dus commembers dalla suprastonza, Tarcisi Hendry e Primus Deragisch, vegn approbaus senza objecziuns.

5. **Rapport annual dil Cussegl pastoral**

Il rapport annual 2025 dallas co-presidentas dil Cussegl pastoral Tujetsch, Lucia Giossi ed Imelda Monn, omisduas Rueras, vegn approbaus senza objecziuns. Il meinradunonza engrazia allas duas presidentas e fa enconuschent als presents ch'ellas omisduas hagian remess lur uffeci pil di dad oz. Omisduas ein stadas activas sur biars onns e prestau grondiusa lavur per la pastoraziun ella pleiv. Medemamein remess ha era commembra dil cussegl pastoral, dunna Roswitha Monn, Sedrun. Ad ellas treis vegn engraziiau cun surdar in schenghetg. - Era Richard Cavegn, Camischolas e Margrith Cavegn, da Sedrun han abdicau. Els ein stai engaschai duront plirs onns activs sco lectur/a e per parter ora la communiun e retscheivan medemamein in present sco engraziament.

6. **Rendaquen, rapport dils revisurs ed approvaziun dil quen 2025**

Cassier Primus Deragisch, Bugnei, repassa il quen dalla pleiv e dallas treis baselgias da Sedrun, Rueras e Selva cun far attents sin expensas ed entradas specialas. Dils quens annuals dallas capluttas ha mintgin saviu prender investa el rapport annual. Igl onn da quen ei en general staus ordinaris. Dil quen da gudogn e sperdita seresulta in gudogn da 132'113 frs.

In vischin damonda informaziuns davart las pagas el sector da pastoraziun. Il cassier declara ch'ei setracti dallas pagas bruttas dils emploiai dalla pastoraziun entochen ils 31 da fenadur 2025. Naven digl 1. d'uost 2025 ei la Regiun pastorala Sursassiala ida en funcziun. Dapi lu vegnan tut ils cuosts menai sin in conto communabel e reparti tenor ina clav definida el contract da cunvegnientscha. Tochen la fin digl onn ein cuosts ella summa da 67'974 frs. seresultai. Mintga pleiv contribuescha ina contribuziun da sochel da 10 %, pia per 2025 mintga pleiv la summa da 6797 frs. Il rest vegn repartius tenor il diember dad olmas da mintga pleiv; per la Pleiv Tujetsch fa quei 22'301 frs. Cul niev onn 2026 van tuttas pagas per la pastoraziun sul conto regiun pastorala ora.

Tier la bilanza repassa il cassier ils differents contos tier activas e passivas. Ton tiel quen sco era tier la bilanza vegn tschentau neginas damondas.

Tier las treis baselgias seresulta

per la baselgia parochiala in gudogn da 4891 frs.,

per la baselgia a Rueras in da 320 frs e

per la baselgia da Selva in gudogn da 636 frs.

Dils quens dallas capluttas dalla val negin che tschenta damondas.

Pertuccont las messas fundadas orientescha il cassier en quei senn che tochen ussa fuvien quellas dosadas cun 500 frs per 20 onns, da niev san ins era far ina messa fundada per 10 onns per 200 frs.

En num dils revisurs da quen, Andrina Flepp, Sedrun e Giusep Decurtins, Sedrun, pren Giusep Decurtins il plaid. Els dus han repassau il quen e dau giu in rapport publicaus el rapport annual 2025.

Per mauns dalla radunonza generala fan els las suandontas propostas:

a) d'approbar la bilanza e quen 2025;

b) da dar scarica al cassier ed all'entira suprastonza;

c) d'exprimer engraziament a tuts funcziunaris per la lavur prestada.

Plinavon admetta el in compliment per la presentaziun dil rapport e quen annual en ina biala ed informativa brochura.
Il quen e la bilanza vegnan approvai da tuts presents.

7. **Approbaziun dil preventiv 2026**

Cassier Primus Deragisch s'exprima ch'il tschentar si in preventiv seigi buca adina lev, denton hagien nus empruau da far in preventiv en fuorma dils onns vargai cun l'egliada sin la situaziun acutuala ed avegnir. Las entradas ein calculadas cun 374'250 frs. e las expensas cun 312'700 frs. e quei seresulta in gudogn da 61'550 frs. Il preventiv 2026 vegn acceptaus unanimamein entras presentas e presents.

8. **Fixar il pei da taglia 2026**

La suprastonza ed ils revisurs da quen proponan alla radunonza generala da fixar il pei da taglia sco suonda: Pigl onn 2026 duei il pei da taglia restar sco per 2025 sin 15% digl importo dalla taglia semplia dil cantun.
Unanimamein vegn la proposta acceptada da laschar il pei da taglia sco tochen dacheu.

9. **Elecciuns**

Ussa dapi in onn ei il post da president ella suprastonza vacants. Tuttas breigias d'anflar ina persuna, ina dunna ni in um, ein stadas senza success. Aschia vein nus partiu la lavur sin duas persunas. Il davos temps vein nus desistiu dad encurir in president/a e favorisau l'idea dad encurir in commember ni ina commembra per la suprastonza. Oz savein nus plascheivlamein annunziar ina candidata per la suprastonza dalla pleiv e quei ella persuna da dunna Rezia Giger, Selva. Cun in ferm applaus vegn ella elegida sco commembra dalla suprastonza. Gratulaziun ed engraziament.

Elecciuns dil Cussegl pastoral. Dils commembers actuals resta mo pli in sulet, numnadamein Marcus Munsch, Sedrun. La damonda setschenta: Co vinavon cul cussegl pastoral ch'ei vegnius formaus igl onn 1978 cun 15 commembras e commembers? Il cussegl ha primarmein il pensum da sustener il plevon ella pastoraziun e porscher diversas activitads per la tgira dalla pastoraziun ella pleiv.

Rilana Cadruvi, nossa collaboratura pastorala per la regiun, pren cheu bugen il plaid. Ella selegra en emprema lingia dad esser cheu alla radunonza da pleiv. En caussa cussegl pastoral van sias ponderaziuns en direcziun d'in cussegl pastoral per la Regional pastorala Sursassiala cun representants da tuttas treis pleivs. Las singulas pleivs sappien funcziunar cun structuradas da gruppas pastoralas activas en differents secturs ella pleiv. Il cussegl pastoral regional corrispunda ad in parlament da 5-7 persunas che activeschan en favur dalla regiun, sco era en favur dallas treis pleivs differents eveniments pastorals per tuttas spartas da vegliadetgna.

Elecciun d'in delegau-suppleant el parlament dalla Baselia catolica Grischuna. Ils davos quater onns ha la Pleiv Tujetsch tarmess in delegau a Cuera ella persuna dil president cass Arthur Caduff, Sedrun. Pil bienni suandont da quater onns sa la Pleiv Medel/Lucmagn tarmetter in delegau a Cuera. La Pleiv Tujetsch sa numnar in delegau-suppleant. Ord las retschas croda negina proposta. Aschia resta ei alla suprastonza dad encurir ina persuna beinvulenta dad ir a Cuera e quei en cass ch'il delegau da Medel sa buca prender part.

10. **Informaziuns**

- Las informaziuns impurtontas dalla suprastonza ein gia curdadas fin ussa el decuors dalla radunonza.
- Las duas copresidentas dil cussegl pastoral desistan da prender il plaid.

12. **Varia**

Igl actuar pren sco empren la caschun dad engraziar a Silvio Soliva, Sedrun. Dapi onns eis el il ministrant fideivel a caschun dallas sepulturas. Cun el ensemen e culs plevons funcziunescha quei oreifer bein. Bien engraziament. - Marcus Munsch, Sedrun, prepara per mintga meins in survetsch divin dil plaid ed organisescha ed empeila era quels cun differents gidonters/ras. Ses survetschs divins ein da cuntegn profund e edificonts da tedlar. Engraziament! - Per tuts auters engaschai ella pleiv vegn extendidamein engraziou el rapport annual.

In vischin exprima in engraziament al Chor baselgia da Sedrun per la biala tempru ch'el dat a caschun da plirs survetschs divins duront igl onn ora. Agl organist, Claudio Simonet, drezza el medemamein in engraziel e fa attents sin il toc d'orgla da gronda qualidad ch'el suna mintgamai alla fin da mintga survetsch divin. In laud ed engraziament reparta el era al Chor da sepulturas che levgiescha ina sepultura cun siu bi ed edificont cant.

Igl actuar menziunescha era l'impurtontadad dalla Societad da musica e dils giuvenils a caschun da fiastas cun processiuon cun era admetter a quels engraziament.

In vischin emprova da dar empau fiug als presents e presentas cun visar sin nossa bellezza baselgia e siu reh e magnific cuntegn. El fa attents sil cletg da ver in organist ed accentuescha ils bellezza survetschs divins dil plaid profunds ed edificonts e suttastreha il plascher d'haver ussa per la regiun ina collaboratura pastorala. Derasai pli bia fiug per nossa pastoraziun!, dreza el als presents ed allas presentas.

Igl actuar visa ils presents sin la publicaziun dil cudisch da cant il "Clom" che vegn presentaus per tuttas treis pleivs a Mustér da Tschuncheismas avonmiezdi, ils 24 da matg 2026, duront il survetsch divin.

Ina presenta giavischa informaziuns davart la situaziun actuala cul catechet Stefan Bolli, Mols. La televisun romontscha e la Quotidiana han rapportau. Ils responsabels dalla pleiv han priu per bien e prudent da buca s'exprimer ellas medias. Il cassier Primus Deragisch, Bugnei, pren il plaid ed informescha.

Gia dapi in temps existan aunc autras tematicas dispoteivlas denter il catechet e la pleiv. Signur Bolli fa valer spensas senza saver mussar si la necessitad, per exempel lavur da preparaziun per las lecziuns da religiun ni per surluvrar lecziuns; ulterieuramein fa el valer spensas per preparaziun da survetschs divins dil plaid cun biaras uras da preparaziun. - Per nus ei quei ad intermin liquidau.

Ductrina:

Ell'instrucziun da religiun setracta ei en emprema lingia da problems da distanza. Per esser sin la vart segira vein nus dispensau el, buca abdicau, e quei era sin proposta dil vicari general signur Peter Camenzind, uestgiu da Cuera. La piazza da catechet ha el gia abdicau il meins november 2025 sin la fin digl onn da

scola 2025/26. Il problem ei denton buca digns d'ina tgisa, ei denton buca simplamein nuot e nunacceptabels. Cun l'emprema reacziun han plirs geniturs priu ils affons dall'instrucziun da religiun e pretendiu che nus mettien a disposiziun ina persuna sco survegionza dall'intrucziun dil catechet. Las classas il pli fetg pertuccadas han anflau sustegn e la caschun da tschintschar davart ils problems cul catechet cun la scolasta da classa. Il protocol da quellas discussiuns culs affons ei era vegnius tarmess a Cuera, agl usetg Joseph Maria Bonnemain ed al vicari-general P. Camenzind. La dispensiun ei buca stada in effect singul, mobein ina cumulaziun da plirs cass vegni a nus enconuschent.

Ils problems ils pli accuts pils responsabel, sedai entras la situaziun, ein immediat stai la preparaziun dall'Emprema sontga communiun e la preparaziun per la Creisma. Grazia al spontan agid dils catechets Uschi Cavegn, Camischolas, e Hubert Venzin, Rueras, vein nus anflau ina optimala sligiazion per quellas classas tochen alla fin digl onn da scola.

Pigl onn da scola 2026/2027 retscheivan ils affons negina instrucziun religiosa el senn tardiziunal. Els fan part dallas lecziuns eticas tiel scolast da classa. Pils affons dalla tiarza classa cun l'Emprema communiun mirein nus d'anflar ina sligiazion cuntenteivla per tuts cumpigliai, affons e geniturs.

In vischin plaيدا da nossa religiun e la posiziun da biars ch'ei encunter il immigrats e fugitivs e ch'ins duessi era veser tgei che biars da quels portan positiv a nossa tiara. El accentuescha ch'ins duessi ver dapli curascha da star en per la religiun. Plinavon suttastreha el da mirar, tgirar e guder la natira e che quella significheschi la scaffiziun da Diu.

Ina dunna exprima egraziament per nossa lavur. Niessegner gida, fuvi la devisa en siu ambient – mo cheu seigien il biars d'in meini cuntrari. Ella seigi oz cheu cun gronda perschuassion e cun positiva vesta pigl avegnir.

Terminaziun

Igl actuar engrazia a tuts per la participaziun e giavischa in bien retuorn a casa. La radunonza dad oz seigi stada zun positiva. Tuts astgien serender a casa plein speranza per in bien avegnir dalla pleiv.

Ils responsabel envidan ad in sitg ed alla pusseivladad da parter entgins plaids denter vischinas e vischins.

La finiziun fa in film dils onns 1950 filmaus en connex cun ina rapportascha sur dalla Viafier Furca Alpsu oz VMG che sa festivar uonn siu 100avel onn d'existenza. Il film ei in ver bischu e muossa scenas custeivlas d'antruras, aschia era ina radunonza da vischnaunca sil plaz Cadruvi a Sedrun.

Sedrun, ils 26 d'avrel 2026

igl actuar

A handwritten signature in black ink, appearing to read 'Tarcisi Hendry'. The signature is stylized with a large, looped initial 'T' and a long, horizontal stroke extending to the right.

Tarcisi Hendry

Cun resalva dall'approbaziun entras la radunonza generala 2027.